

ULLOQ Septemberip 8 2023

UKA2023/45

**Najugaq qimannagu isumaginninnermi siunnersortitut ilinniarfimmik pilersitseqquullugit
Naalakkersuisut peqquneqarnissaannik Inatsisartut aaliangiiffigisassaattut siunnersuut.**

(Inatsisartuni ilaasortaq Peter Olsen, Inuit Ataqatigiit)

Siumumiit aalajangiiffigisassatut siunnersuuteqartumut, Peter Olsen, Inuit Ataqatigiinneersumut qujavugut.

Siullermillu eqqaqqaaqarusupparput Naalakkersuisup akissuteqaataa sivisuumik utaqqimaarsimagatsigu, ullaaq manna aatsaat akissuteqaataat tiguarput, taamaattumillu piffissartoqqilluta ullaaq manna Siumumiit akissuteqaatissarput nutaamik tuaviortumillu qulaajaaqqilluta suligasuaqqippugut. Tamanna ajorpoq. Taamaammat tamanna Siumuminngaanniit uparuarumavarput, tassami una siunnersuut Aggustimiilli nassiunneqareersimammat, tupinnalaarpoq Naalakkersuisumit piffissaagallartillugu akissuteqaatiliorfingineqarsimannngimmat. Suliat pimoorullugit suliniarluni utaqqimaarnarpoq, pingaaruteqarluinnarpormi Naalakkersuisut akissuteqaataannik ersarissaassuteqartumik peqarnissaq, sattallutami ingerlaarniarsinnaannginnatta. Taamaattumik Naalakkersuisut kaammattorusuppagut qulequtaq suugaluارتلۇنىت siusinaarnerusumik akissuteqaateqarfigisassagaat.

Siunnersuuteqartup tunngavilersuutaani Perorsaanermik Ilinniarfik tunngavilersuutigivaa, tunngavilersuutaaniittorlu ippigivarput, tassami Perorsaanermik Ilinniarfimmik Ilulissaniittumi Isumaginninnermi Siunnersortinngorniartoqarsinnaanera taakkartormagu, Siumumiilli tamanna ilisimavarput taamaangitsoq, tassami Ilulissani Perorsaanermik Ilinniarfiup ilinniakkatut neqeroorutaa allaavoq, tassaammammi Isumaginninnermi Suliaqarnermi Siunnersorti, taamaammallu taanna ilinniagaq Isumaginninnermi Siunnersortiunani. Tassami nalunngisatsitut Isumaginninnermi Siunnersortitut ilinniarfik Ilimmarfimmik ilinniakkatut neqeroorutaasoq taamaallaat piuvoq. Isumaginninnermik Siunnersortitut ilinniagaq bacheloriuvoq, aappaalu Isumaginninnermi Suliaqarnermi Siunnersortitut ilinniagaq ilinniagartuutut taaguuteqarluni, tassa danskisut akademiuddannelse. Taannalu ilinniagaqareersimasunut ilinniakkamik qaffassaaffittut neqeroorutaalluni. Taannalu najugaq qimannagu ilinniagaalluni, taamaallaallu illoqarfimmut isumaqataaffiusumut, kommunep ilinniarfiullu isumaqatigiiffigisaanut, sapaatit akunneri marluk ukiumut marloria ingerlanneqartarluni, sinnera najugaqarfigisamit suliffeqaatigaluni ingerlanneqartarluni.

Taamatut ersarissaassuteqarluta aallarniuteqarluta, siunnersuuteqartup siunnersuutaa soqutiginarpoq, tassami inuiaqatigiinni ilinniarnerup siuarsartuarnissaa Siumumit soqutigilluinnakkatta ilagimmassuk. Nunatsinnilu ilinniartitaanermut tunngasut misisorluarlugit, nunatsinnut pitsaasumik sunniuteqarluarnissaannik eqqarsarluarnissaq, suut amigaatigineqarneri qulaajartuarnissaat, suut inerisarluarneqarsinnaanerinik eqqartueqataajuarnissaq pilersitsisinnaanerillu Siumumit soqutigilluinnarpagut.

Ullutsinni nittartagaq atorlugu sorpassuit ilinniarsinnaalernikuugut. Nunatsinni tamanna eqqummaariffingippallaqaarput. Tuluttut oqaatsit nittartagaq atorlugu kalaallisut nutserneqarsinnaanngortuuppata, ilinniagarisinnaasat amerlasoorpassuit, amerlasuutigut nammineq akiliinikkut, ilinniagarineqarsinnaalernikuupput. Alimasissumillu atuartitsineq aammalu ilinniagaqarsinnaaneq nunatsinnissaaq misilittagaqarfigilereernikuugut. Coronap eqqullarmatigut puigussanngilarput ilinniarfiit atuarfiillu pitsaasumik alimasissumik atuartitsimmata, ilikkarneqarluarluni pimmat ilikkakkat katarsorluarneqarsinnaalluarput.

Isumaginninnermi Siunnersortinngorsinnaaneq najugaq qimannagu ilinniagarineqalernissaanut eqqarsaat soqutiginartipparput. Sineratsinni ilaqtuttat qimannagit ilinniarsinnaanerit tapersorsornarput, misilittakkammi takutippaat iluatsiffiulluarsinnaasoq. Iluatsilluarnissaanulli pingaarluinnarpoq ilinniakkap suliarilluakkamik sinaakkuseqqaarneqarnissaa, ilinniartitsisullu pitsasut ilisimatuut atorsinnaanissaat.

Tassami Ilulissani Perorsaanermik Ilinniarfik allamiit tikillutik ilinniartitsisoqartarnerat ilisimaarivarput. Akeriani Ilisimatusarfimmi ilisimatussutsikkut ilinniagallit piusut. Taamaammat piffik qimannagu Isumaginninnermik Siunnersortinngorniarsinnaalernissaq suliassaq siunissami piviusunngorsinnaasoq, Ilisimatusarfimmit suliarineqarpat, akuersaarsinnaavarput.

Ataatsimiitaliamili ilinniarnertuunngorniaqqaarluni isumaginninnermut siunnersortinngorniarsinnaaneq danskisullu piumasaqaateqarnera misissoqqunarpoq, tassami ilaqtigut kalaallisut oqaasiliinnarnik isumaginninnermi siunnersortinngorniarfimmi ilinniartitsisoqarsinnaaratartoqarsinnaanera soqutiginarmat. Saniatigullu ilinniutit kalaallisut sananeqarsinnaappata ilinniusiortunut pitsaasumik aningaasartaqarnissaanik malitseqassasoq qulaajarlugu misissoqqunarlunissaaq. Tamakku tamarmik pisariaqarput nunatsinni inuiaqatigiit amerlanersaat periarfississinnaanissaannik angutserinitssini. Kalaallisullu oqaatsitsinnik ilinniusiorsinnaasut pisariaqarteqigatsigit.

§37-mi apeqquteqarsimasut marluk atuarakkit akissuteqaammi erserpoq najugaq qimannagu isumaginninnermik ilinniagaq missingersorlugu ukiumut 1,5 – 2,5 mio kr missaannik naleqartoq, ukiullu sisamat ilinniagaasarmat, ukiut sisamat 6 – 10 mio kr missaanni ilinniagaq naleqassalluni.

Naalakkersuisut allaannguutissatut siunnersuutaat “**Najugaq qimannagu isumaginninnermi siunnersortitut ilinniariaatsimik, pisariaqartitat aallaavigalugit misissuinissamik Attassinissamut Siuariartornissamullu Pilersaarut 2-mi, aaqqissusseqqinnermi siunnerfik 1, Ilanniartitaanerup piginnaasallu qaffasinnerat suliarineqarnerani pissasoq Naalakkersuisut peqquneqarnissaannik Inatsisartut aalajangiiffigisassaattut siunnersuut.**” Siumuminngaanniit ilalerlugu siunnersuut Kultooreqarnermut, Ilanniartitaanermut, Ilageeqarnermut Ilisimatusarnermullu ataatsimiititaliamut qulaajagassanngorlugu ingerlateqqipparput.

Oqaaseqartoq, Najaaraq Møller Siumut